



SUSANA RODRÍGUEZ ESTÉVEZ, deputada do Grupo Socialista da Deputación Provincial de Ourense, en base ó previsto no artigo 14 do Real Decreto 2568/1986, de 28 de novembro sobre Regulamento de Organización, Funcionamento e Réxime Xurídico das Entidades Locais, presenta a seguinte:

PREGUNTA (3) PARA SER FORMULADA E RESPOSTADA ORALMENTE NO VINDEIRO PLENO ORDINARIO DO 23 DE FEBREIRO DE 2024.

A Deputación de Ourense resolveu contratar a edición dunha biografía do escritor e político Eugenio Montes, figura sobranceira do fascismo español. A Deputación vai destinar un monto de 11.190,64 euros do erario público para a publicación de **Eugenio Montes, o intelectual silenciado**, unha haxiografía arredor dun importante e temperá apoloxista do fascismo español, con gran impacto no pensamento antidemocrático da España do primeiro terzo do século XX, nomeadamente durante a década de 1930.

Montes é considerado un dos fundadores da Falanxe Española, tendo realizado varias viaxes á Italia fascista e á Alemaña nazi para coñecer o funcionamento dos seus sistemas propagandísticos, non agochando nunca a súa admiración por Hitler. A Fundación Francisco Franco ten unha páxina dedicada a enxalzar a figura de Montes na súa condición de referente teórico do fascismo español, contribuíndo as súas crónicas e escritos a estender a ideoloxía antidemocrática entre partidarios do golpe á II República.

Entre perfís cualificados e expertos a conclusión é clara: ao contrario que Cunqueiro ou Risco, Montes non fixo unha viaxe de ida e volta, considerado un fascista asumido e ideólogo orgánico da Falanxe española. E, desde logo, Montes non foi un “intelectual silenciado”, nin moito menos! Non hai máis que comprobar a cantidade de artigos publicados, homenaxes recibidas, honras e condecoracións recibidas antes do seu pasamento, en 1982.

1. No 2002, a Xunta de Galicia editou un traballo sobre a dimensión literaria da personaxe baixo o título *Antoloxía de la obra de Eugenio Montes*, circunscibindo a escolma en galego e castelán a pezas non políticas nin marcadamente reaccionarias. Sobre que bases resolveu a Deputación de Ourense destinar 11.190,64 euros á elaboración e edición dunha obra para claramente enxalzar a figura dun recoñecido fascista como Eugenio Montes, facendo apoloxía da dimensión política da personaxe?



Grupo Provincial Socialista

Rúa Progreso, 32 – 2º andar
32003 Ourense
988 317 993
CIF: G32244345

2. Sobre que bases se chegou á conclusión que o autor da obra subvencionada pola Deputación de Ourense, Manuel Rivero, é quen de asumir unha obra tan “delicada”? Ninguén, en ningún momento, pensou en contratar a alguén cun perfil experto para elaborar unha biografía crítica de Eugenio Montes, como si se fixo, por exemplo, cando se contou co concurso de Miguel Cabo na edición de *A vida desmedida de Basilio Álvarez*?
3. Existe algún informe previo á adxudicación da subvención que garanta que a publicación desta obra non entra en franca contradición coas disposicións da Lei 20/2022, de 19 de outubro, de Memoria Democrática, nomeadamente no que atinxe ao feito que as administracións públicas en ningún caso poderán outorgar subvencións que teñan por obxecto a realización dunha actividade cuxa finalidade atente, alente ou tolere prácticas consideradas como infraccións pola devandita Lei?

En Ourense, a 22 de febreiro de 2024.

Asinado: Susana Rodríguez Estévez.

SR. PRESIDENTE DA DEPUTACIÓN PROVINCIAL DE OURENSE